

## Publicaziuns ufficialas dils 8 da decembre 2023

### Vischnaunca Trun

#### Damonda da bagheggiar

**Datum da publicaziun: 08-12-2023**

Potent: Eduard Hintermüller, Rosstrasse 47, 8832 Wollerau  
Object: Montasca da quater pumpas termicas d'aria sin parcella 2659 a Trun.  
Zona: Zona da habitar (H2)

#### Protestas:

Ils plans ein deponi en canzlia communal. L'investa publica cuoza 20 dis dapi il datum da publicaziun. Protestas ein d'inoltrar en scret enteifer 20 dis dapi la publicaziun alla suprastonza communal Trun.

*Administraziun communal Trun*

#### Sessiun dil cussegl da vischnaunca gliendisdis, ils 11-12-2023 allas 19.30 ell'aula dalla casa da scola

#### Tractandas

1. Approbaziun dil protocol dalla sessiun dils 13-11-2023
2. Damonda dall'uniu Trun Cultura per ina contribuziun da frs. 100'000.- vid il tettg da lenn accessibel dalla Casa Carigiet
3. Verificaziun dils resultats dallas elecziuns communalas dils 26-11-2023
4. Pusseivladad da tschenttar damondas

*Administraziun communal Trun*

#### Rapport dalla radunanza da vischnaunca dils 04-12-2023

#### Tractanda 1

#### Avertura ed elecziun da 2 dumbravuschs

Sco dumbravuschs vegnan Anna Maria Cavigelli e Flurina Bundi elegidas.

## Tractanda 2

### Approbaziun dil protocol dalla radunanza communalala dils 05-12-2022

Il president communal Dumeni Tomaschett declara ch'il protocol seigi staus a disposiziun tier l'administraziun communalala per investa. Cunquei che negin giavischia la preleczion dil protocol sa vegin passau tier la votaziun d'approubaziun.

**Il protocol dalla radunanza communalala dils 05-12-2022 vegn approubaus en votaziun unanima cun engraziament.**

## Tractanda 3

### Decisiun da sligar si la Corporaziun schigentera solara da giet Cadi

Dapi la primavera 2003 ei la schigentera solara da giet Cadi a Zignau en funcziun e schigenta il giet dallas sereneras da Sedrun, Mustér, Curaglia, Zavragia (Sumvitg/Trun) e Sorts (Breil). Ils davos onns cun adina dapli e pli ferma aurasut a Zignau e Lumneins ein era las immissiuns da friads pils vischins s'augmentadas considerabamein. Las reclamaziuns dils direct pertuccai ein veginidas adina pli savens. Suenter ver schau elavurar persunas dil fatg pusseivladads co ins savess dar damogn allas immissiuns da friads ein ins vegin tier suandontas conclusiuns:

Ina eliminaziun dils friads ei custusa e caschuna cuosts per la dismessa dil giet entras la Corporaziun schigentera ch'ein la finala massiv pli aults che tier la dismessa dil giet ella TRAC a Cuera. Era savess ei ordavon buca vegin garantiu che las immissiuns da friads savessan vegin eliminadas completamein. Sin fundament d'art. 46 dils statuts dalla Corporaziun schigentera solara da giet Cadi propona la radunanza da delegai dils 16 da fevrer 2023 allas vischunauncas dalla corporaziun da dissolver la Corporaziun schigentera solara da giet Cadi.

La suprastanza communalala ed il cussegli da vischunaunca sustegnan la proposta da sligar si la corporaziun schigentera solara da giet.

**La radunanza communalala decida cun 43:0 vuschs da sligar si la Corporaziun schigentera solara da giet Cadi.**

## Tractanda 4

### Preventiv per igl onn 2024

Il president communal informescha ch'il cussegli da vischunaunca hagi tractau il preventiv 2024 e proponi unanimamein l'approubaziun da tal.

Il preventiv dil quen da gudogn e sperdita 2024 siara cun in surpli d'entradas da frs. 2'080'800.- Il gudogn avon amortisaziuns mutta à frs. 2'655'000.-. Il quen d'investiziuns preveda investiziuns nettas da frs. 3'896'900.-.

Las posiziuns principalas dil preventiv d'investiziuns secumponan ord:

3290.5290.00	Fiasta 600 onns Ligia Grischa	frs. 800'000.00
3500.5030.00	Sanaziun plaz e mir avon baselgia Nossadunna	frs. 410'000.00
6150.5010.05	Via Campliun – Caltgadira	frs. 1'370'000.00
6150.5010.07	Via Darvella – Gassa sut	frs. 900'000.00
6190.5060.00	Maschina communalala	frs. 160'000.00
7101.5031.00	Sanaziun aquaduct Schlans	frs. 260'000.00
7201.5032.00	Sanaziun canalisaziun communalala	frs. 250'000.00
8201.5030.00	Butschin d'aua Munt	frs. 450'000.00
8205.5010.04	Via Nadels – Rost	frs. 1'000'000.00
8714.5214.00	Ovra hidraulica Furschaniz Schlans	frs. 300'000.00

Suenter quellas explicaziuns surdat il president il plaid alla canzlista communal per informaziuns detagliadas davart il preventiv 2024. Sandra Gautschi presenta las diversas spartas dil preventiv cun dar las explicaziuns necessarias.

**Ils presents approbeschan en votaziun unanima il preventiv dil quen da gudogn e sperdita ed il preventiv dil quen d'investiziun pigl onn 2024.**

## Tractanda 5

### Fixaziun dil pei da taglia pigl onn 2024

Il president communal informescha che la suprastanza communal, la cumissiun da gestiun ed il cussegl da vischernaunca proponien alla radunanza communal da schar il pei da taglia per igl onn 2024 sin 95% dalla taglia cantunala sempla.

**Ils presents fixeschan en votaziun unanima il pei da taglia per igl onn 2024 sin 95% dalla taglia cantunala sempla.**

## Tractanda 6

### Varia

Sut varia informescha il president communal davart entginas actualitads.

*Per la suprastanza communal*

*Il president, Dumeni Tomaschett*

*La actuara, Sandra Gautschi*

## Pignola da Nadal

Il pigniel da Nadal sa vegnir empustaus tier il selvicultur da revier entochen ils 15 da december (tel. 081 943 25 78 ni 079 417 49 57).

La pignola da Nadal vegn repartida **gievgia, ils 21 da december** naven dallas 8.00 – 12.00 en luvratori.

Prezis;	pègn tenor lunghezia frs. 15.– / 20.– / 25.– / 30.– viez «Weisstanne» tenor lunghezia frs. 35.– / 45.– pègn da Nordmann tenor lunghezia e qualitat frs. 35.– / 50.– / 75.–
---------	---

Sin damonda vegnan ils pineuels era furni a casa (+ frs.5.–).

Scumandau ei da tagliar sez il pigniel; en uauls da schurmetg, en uauls da producziun da lenna, sin schischom privat senza lubientscha dil proprietari.

Pignola che crescha sin alps e pastiras, agl ur dil Rein, dalla Ferrera e dalla Zavragia astga vegnir tagliada libramein.

*Uffeci forestal Trun*

### Fittaziun da parcellas da vischnaunca

La vischnaunca da Trun fittescha naven digl 1. da schaner 2024 suandontas parcellas per cultivaziun:

Pendas casa da pèschs	2740	78 aras
Pendas casa da pèschs	1661 c	20 aras
Pendas grondas	1654 m	95 aras
Prau Caltgera	2743	42 aras
Pendas s. Mathias	1654 c	29 aras
Prau s. Onna	1630	5 aras
Plaun Rensch	5149 k	51 aras

Contact: Suprastonza communal, Lucas Arpagaus, Caum postal 9, 7166 Trun

*Suprastonza communal Trun*

### Fittaziun da parcellas e d'ina garascha dalla pleiv catolica romana

La pleiv catolica romana Trun fittescha naven digl 1. da schaner 2024 suandontas parcellas sil territori da Schlans per cultivaziun:

Cultira dalla Parvenda	6072 a	169 aras
Razeil	6057	71 aras
Clavau niev	6042	41 aras

Garascha Pansal

Contact: Pleiv catolica romana Trun, ugau pervenda, Benedetg Albin, Via Plaun 1, 7166 Trun

*Pleiv catolica romana Trun*

### Mortori

Beeli Giusep, naschius ils 29 da november 1931 e morts ils 27 da november 2023.

*Controlla da habitants Trun*

## Iniziativas pertucond il plaz da pausa

Preziadas coniniziantas e prezai coniniziants

Sco vus haveis saviu leger els davos Fegls ufficials ein ton la vischnaunca sco era il cussegl da scola sefatschentai dallas iniziativas. Ils pass entochen ussa ein stai pusseivels grazia a vies sustegn. Grond engraziament persuenter. Las perscripziuns pils affons ein vegnidias sluccadas, il plaz engrondius ed ils giugs vegnan refrestgentai. La midada edificala ei en planisaziun tier la vischnaunca.

In engraziament admettein nus era allas instanzas communalas ed al cussegl da scola per ils buns discours e la promtadad dad anflar communablamein ina via che cuntenta omisduas partidas.

Nus vegnin vinavon a s'engaschar per ina realisaziun egl interess pils affons. Grond engraziament ed in bi temps d'avent.

Ils 5 preminiziats: Ricarda Tuor, Catrina Livers, Lisa Giorgio, Caroline Demont/Pascal Albin e Renzo Albin

## Apparat d'udida

Gliendisdis, ils 11 da december 2023 saveis Vus schar schubergiar e rugalar Vies apparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el PUNTREIS, Center da sanadad a Mustér

Dunna Giger dalla firma Amplifon AG e signur Gfeller dalla firma Jäggi Optik & Hörberatung AG surprendan communablamein quei survetsch gratuit per tuts interessents. Ei drova negina annunzia.

## Uniun Trun cultura

### Spazi Spescha fascinescha

Cun l'exposiziun da Matias Spescha. Retuorn a Trun – Retuorn a casa dils 17 da zercladur entochen ils 29 d'october ella gronda halla dalla fabrica da ponn eis ei reussiu a curatur e curatura da presentar a moda impressiunonta las davosas ovras digl artist indigen cun renom internaziunal. Igl ei ina rescuerta culminonta e monumentala digl art svizzer ed internaziunal entuorn la midada da millenni.

Il grond interess da visitaders ha survargau nossas spetgas: Nus havein registrau enteifer quels quater meins e miez 1'775 visitaders, incl. hospes, commembres e giuvenils sut 20 onns cun entrada gratuita. Il resun e las notizzas el cudisch da hospes ein surprendentamein positivas aschibein da laics sco era da profis ord la scena d'art e cultura.

Muort il grond interess essan nus sedecidi dad arver sin damonda l'exposiziun per gruppas, scolas, uniuns ni cerchels interessai e quei entochen ils 3 da mars 2024.

In'annunzia ei pusseivla sut [info@trun-cultura.ch](mailto:info@trun-cultura.ch)

La proxima exposiziun el Spazi Spescha pigl onn 2024 ei gia en planisaziun. Ella stat el segn d'in dialog denter Matias Spescha ed in'artista hospitonta.

Il team da Trun Cultura engrazia cordialmein a tuts visitaders mo era a tuttas persunas ch'ein s'engaschadas pil bein reussir da quei event sco era als promoturs per lur generus sustegn.

### **Sontgaclau**

Cars affons. Era uonn fa Sontgaclau puspei **venderdis, ils 8 da decembre 2023**

allas 17:30 avon la stalla da Catrina e Silvio Livers ina viseta a vus. Per mussar la via a Sontgaclau fuss ei bi sche biars affons portan ina latiarna. Suenter stein nus aunc in mumenet da cumpignia cun petta e punsch.

Nus selegrein da far in beinvegni a Sontgaclau ensemen cun biars affons.

*Uniun da giuventetgna ed uniun da dunnas*

### **Canorta Lumpazi**

Mira sut Disentis/Mustér.